

mate. E mohio ana au na te kaha o enei Neehi ki te haere ki te tiroiro i nga kainga Maori, me nga tangata e pangia ana, i kore ai e horapa haere te mate Taipo Piwa ki nga kainga katoa a i ora ai hoki te nuinga o nga tangata e pangia ana.

PUKAPUKA WHAKAMARAMA.

Kei roto i enei kupu (pukapuka whakamarama) te hiahia o taku Tari ki te tuku whanui i nga tohu-tohu me nga whakatupato ki nga takiwa katoa. E tukuna ana enei pakupaku ki nga mema o nga Kaunihera me nga Komiti. E uru ana i etahi wa, nga whakamarama mo nga mate Uruta ki roto i te Nupepa Maori ki te Toa Takitini, a ma taua Toa nei kawe etahi korero ki nga marae o te iwi Maori.



Te Keehi a te Arawa Mo Nga Moana.

I te taenga atu o Peneti Minita ki Poneke ka patataia mo te ahuatanga o te whakatau o nga moana o Te Arawa. Ko te korero nui a etahi tangata i te wa o te pooti, kua mate taua keehi, a kua kore i mohiotia he aha ranei te hua ka puta ki a Te Arawa mo tana mahi nui mo ana moana.

E Te Arawa katoa whakarongo mai koutou. Kua oti te haina me te hiiri o enei korero, ara ko te moni kua whakaaetia hei utu i ia tau i ia tau ma te Kawanatanga ki te Poari ka whakaturia mai nei e koutou e Te Arawa e Ono Mano Pauna (£6,000.) Kei a Maehe kei a Aperira ranei tae atu ai te Mangai o te Kawanatanga ki Rotorua ki te whakatu i te Poari hei whakahaere mo taua moni, ara hei hanga i nga rekureihana e mohiotia ai nga huarahi hei whakapaunga mo taua moni, i ia tau i ia tau. Ko te taitara ki o tatou moana kei te Kawanatanga inaianei. Mehemea kaore te Kawanatanga i whakaae ki te utu i whakaritea ai e nga kai-whakahaere o Te Arawa ara te £6,000 i te tau, kua kore ona mana ki o tatou moana. I te mea kua riro i a ia nga moana, ka riro hoki